

四庫全書

史部

欽定四庫全書

後漢書補逸卷十

監察御史姚之駟撰

謝承後漢書第二

陳寵

陳寵曾祖咸字子成為廷尉監議人常從輕比論報多
所全活皆稱恩也

案寵見東觀記咸係前漢哀平間人謝書序寵先世
獨詳范亦畧同但咸以律令為尚書未為廷尉監也
案咸生欽欽生躬躬乃寵父曾為廷尉左監此其躬
事耶寵雖傳法律而務在寬厚蓋過庭之餘習深矣

王莽篡位咸還家杜門不出莽改易漢法令及臘日咸
常言我先祖何知王氏臘乎

案此亦序寵
先世事也

張意

張意為驃騎將軍討東甌賊意修水戰之具浮海就攻
所向無敵

案水戰亦足兵一要務也今

制江海重鎮設有水師營其海艦設有鋸犁趕繒等號
然承平日久雖大脩小脩屆期不廢而揚帆巡哨或
難入海

皇上安不忘危

命督撫大臣察其廢弛之弊務使戰艦皆堅固如式可
以浮海而于水師營弁必選熟習
海道者為之蓋人人張意矣范闕

馬融

馬融字季長年十三明經為太子舍人校書東觀

案融見東觀記季長以永初二年辭節鴈名四
年復出拜校書則年已非十三也此定有誤

融為校書郎又拜郎中

案范稱融為校書
郎中與此不同

巴祗

巴祇字敬祖為揚州刺史祿俸不使有餘饋毀壞不復改
易以水澡膠墨傅之夜與士對坐處暝暗之中不然官燭

案祇貞介之操不無谿刻自處然以儉化俗未為過
也澡幘坐暝二事甚韻謝每寫廉吏獨詳使豪華者

對之無
色范闕

祇為別駕體素清白以儉厲俗在任不迎妻子

鄧道

鄧道出為馮翊守下車治豪強四海號為豪強所病

案范
書闕

陳龜

安帝時尚書陳龜上表曰仁恩廣被化流殊方便老者以壽終孤幼得保年猶運河轉石易于反掌

案龜字叔珍上黨涇氏人永建中舉孝廉後拜京兆尹會羌寇邊桓帝以龜世諳邊俗拜為度遼將軍臨行上疏數百言獨不見此表且據范傳則安帝時龜未為尚書豈范有遺誤或姓名偶同者與

孟嘗

孟嘗遷合浦太守郡不產穀食而海出珠寶與交趾比境常通商販貨糴糧食先時宰守並多貪穢詭人採取

不知紀極珠遂漸徙于交趾境界于是行旅不至貧者
餓死于道嘗到官革易前弊曾未踰歲去珠復還百姓
皆反其業商賈流通稱為神明

案嘗字伯周會稽上虞人老蚌何靈珠豈能不脛而走
蜚戶以貪守誅求故詭言蚌徙耳廉吏至則羣返其業
矣然如史所傳乃成千古佳話范同

嘗為合浦被徵當還吏民攀車請之不得進乃附商人船遁去

尹昆

尹昆為侍御

闕

時拜尚書僕射詔曰惟君公曹時以

太守之術克獎王室其省錄臺事勿令謬誤

案范書闕公曹
二字疑有脫誤

閔貢

閔貢字仲叔太原人

案仲叔見東觀記此載劉義慶世說
注中仲叔以字行微此則其名泯矣

石苞

石苞字延博為諸生篤行清苦學五經徵拜議郎

案范書闕五經之學近乃極盛然其流弊恐亦在兼
經科中士人墨守訓詁不知箋疏為何物甚且專求

聞擬而習之稍有忌諱概不省覽無論經解矣延博之學五經恐不若此今

聖天子作人意切

諭鄉會試士不必出吉祥擬題以覘實學將來試官拈題自必就生避熟經學之興駸駸日上矣

張稷

張稷字衛君除尚書侍郎左丞朝賀陞見進對威儀辭令辨達明帝深奇異之拜膠東相

案范
書闕

吳祐

吳祐遷膠東相有男子母俱行道遇姦辱其母長遂殺之追捕行長祐問長有子乎曰有妻未有子召長妻至獄解桎梏使同宿遂孕至冬行殺長嚙指斷含血誓若生男名吳生以報吳君也

案祐見東觀記安丘男子名母丘長此所載不明定引用者脫誤

鄧通

鄧通字子淵遷越騎校尉為營吏士所敬畏天下嘆服

案范
書闕

宋度

宋度字叔平除謁者以詔書賜降俟朝關門門開度頓

首讓胡掾賜畢奏罷大鴻臚京師稱曰宋叔平一史奏

罷九卿

案度奏罷鴻臚不知何事但因謁者而斥逐九卿失敬大臣之道矣范闕

宋叔平

豫章宋叔平為定陵令素杯食麥飯

案東漢人名兩字者數此豈以字行即奏罷九卿者耶范不載

高吕

高吕為廣漢太守朝省官事晝誦經典

案范書闕仕優則學昔賢所訓豈必一腰墨綬便甘為俗吏乎况引經斷獄尤為有益吕得之矣

徐防

安帝即位太尉徐防以災異寇賊策免

案防見東觀記范同時防自陳過咎不敢居大位亦異于持祿固寵者持朝廷不宜策免之耳

王充

王充字仲任家貧無書至京師往寺中省所賣書一見

便憶于宅內門牆屋柱皆施筆硯簡牘見事而作著論
衡八十五篇

案充會稽上虞人充所著論衡時多拘
滯未見雄偉而或以為秘玩何也范同

謝夸吾薦充曰充之天才非學所加雖前世孟軻孫卿
近漢揚雄劉向司馬遷不能過也

案夸吾此表未
免獎充過甚

陳堪

陳堪仕郡為五官掾府君被徵廷尉堪以五毒加身體

斷舌無聲

案范書闕堪之事主可謂忠矣天下孰不願以為臣

華崧

華崧為河南尹優賢養民興宗教化至其翦治強宗威烈不虧遂見譖殺

案范
書闕

華松

華松為司隸校尉是時貴戚專勢松下車閉閣不通私

書不與豪右相見姦匿犯者輒奏豪羣斂手由是深見
非恨

案此文義與前傳絕相類疑即一人前尹河南後任司隸其名或傳寫之譌也范闕

戴封

戴封字平仲遷西華令其年大旱禱請無獲乃積薪坐
其上以自焚火起而大雨遽邇嘆服遷中山相

案封濟北剛人積薪自焚近于愚僧所為不然直與
暴巫尪等耳抑封善于占雨知其當以時降故為此
以銜名耶平仲范作仲平

許荆

許荆字子張少喪父養母孝順家貧為吏無有船車休假常單步荷擔上下清節稱于鄉里

案荆會稽陽羨人范載循吏傳

荆兄子常報讎殺人怨家會衆操兵至荆家欲殺之會荆始從府休歸與相遇因出門解劍長跪曰前無狀相犯咎皆在荆不能相教兄既早歿一子為嗣如全死者傷其滅絕今願殺身代之塞咎雖死已往猶謂更生怨

家扶起荆曰許掾郡中稱為賢吾何敢相侵因遂委去

案荆之愛兄固足感動怨家然亦其平日賢聲先為之奪也人或名滿海內而鄉里薄之奚取焉

荆為桂陽太守耒陽有蔣均者兄弟爭財互相言訟荆嘆曰教化不行罪在太守乃使吏上書陳狀乞詣廷尉均兄弟感悔各求受罪柳人謝弘等不養父母兄弟分析因此皆還供養者千有餘人

案荆貧而養母死以報兄惟躬行孝弟故治民亦以孝弟為先也語云以身教者從信然

許季長

許季長為湖令州郡皆被蝗災過湖縣飛去不入

案范
書闕

司馬苞

司馬苞字仲成東緡人也為太尉常食麤飯著布衣妻
子不歷官舍會司徒楊震為樊豐等所譖連及苞苞乞
骸骨未見聽以疾薨

案范書苞無傳安帝紀載元初中大司農山陽司馬
苞為太尉二年六月太尉司馬苞薨范之簡畧如此

張冀

豫章張冀字仲宗為廣陵守舉孝子吳奉為孝廉奉齋金為禮冀閉門不受而奉以囊盛金夜投冀園中而逝冀追不及齋金至廣陵還奉

案范書闕一本作張載卻投園之金其難更甚于四知也千里齋還冀豈以博名高哉

趙煜

趙煜少嘗為縣吏奉檄送督郵煜心恥于廝役遂棄車馬去到捷為資中詣杜撫受韓詩究竟其術

案煜字長君會稽山陰人游學積二十年不歸其家至為發喪制服所著有吳越春秋詩細歷神淵可謂

好學深思之士矣范書又載南陽馮良事與
長君事前後雷同不知何以一時有此二士

杜撫

杜撫字叔和捷為武陽人少有高才受業于薛漢定韓

詩章句

案撫作詩題約義通學者傳
之曰杜君注范載儒林傳

許敬

許敬字鴻卿其吏有誣君者會于縣令坐敬拔刀斷其

席曰敬不忍與惡人同席

案表紀敬汝南平輿人仕至司徒敬值實鄧閻氏之盛直道而進三家之敗多所染汙敬謗不及已當世以此奇之范闕

廣漢儒

廣漢儒字叔林為東郡太守烏巢于廳事屋梁兔產于

牀下

案范
書闕

王況

王況字文伯京兆杜陵人也代為三輔名族該總五經

志節高亮為陳留太守性聰敏善行德教永平十五年蝗蟲起泰山彌衍兗豫過陳留界飛逝不集五穀獨豐章和元年詔以況為司徒

案范書況無傳惟見虞延班彪傳中二人皆況所辟也東閣招賢況不愧矣又光武紀建武二十三年九月陳留太守王況為大司徒二十七年四月司徒王況薨與謝書不合必有一誤王姓音宿

班固

固年十三王充見之拊其背謂彪曰此兒必記漢事

案固之文詞美矣特其出入竇氏以不教學諸子卒至身陷大戮視乃父傾側危亂之間而仕不急進貞

不違人者將無愧
乎范書附彪傳後

陳囂

會稽陳囂少時于郭外水邊捕魚人有盜者囂見避于
草中追以魚遺之盜慚不受自後無復取焉

案以魚遺盜是以道止盜莊子曰盜亦有道乎
則止盜豈無道乎囂蓋得老氏之學者范闕

陳翔

陳翔遷定襄太守寬猛俱濟

案翔字子麟汝南邵
陵人范載黨錮傳

馮魴

馮魴為侍中稍遷衛尉能取悅當時為安帝所寵帝幸其府留飲十日賜駭犀玉具綬珮刀紫艾綬玉玦

案魴見東觀記此為侍中者魴孫石也東觀記及范書皆作石事謝書當亦從同後世類事之書不探全傳本末故混淆若此

唐羌

唐羌字伯游辟公府補臨武長縣接交州舊獻龍眼荔枝乃生鮮獻之驛馬晝夜傳送之至有遭虎狼毒害頓

仆死亡不絕道經臨武羌乃上書諫曰臣聞上不以滋味為德下不以貢膳為功故天子食太牢為尊不以果實為珍伏見交趾七郡獻生龍眼等鳥驚風發南州土地惡蟲猛獸不絕于路至于觸犯死亡之害死者不可復生來者猶可以救也此二物升殿未必延年益壽帝從之章報羌即棄官還家不應徵召著唐子三十餘篇

案范書闕惟見和帝紀云舊南海獻龍眼荔枝十里一置五里一候奔騰阻險死者繼路時臨武長汝南唐羌上書陳狀帝從之勅大官勿復受獻益一騎紅塵不獨始于天寶也

張青

青字公然東都聊城人

案范書青事載張酺傳中青以被矢貫咽音聲流喝
前郡守不能舉酺上書言青三世死節宜蒙顯異薦
賢受上賞
酺不愧矣

王黨

王黨遷汝南太守拔才禮士不敢自專故能化清于上
事緝于下

案范
書闕

高慎

陳王鈞多不法行天子大射禮陳國戶曹史高慎諫國
相曰諸侯射豕天子射熊八彝六樽禮數不同昔季氏
設朱干玉戚以舞大夏左傳曰惟名與器不可以假人
奢僭之漸不可聽也于是諫諍不合為王所非坐司寇
罪

案明帝子陳敬王羨薨子思王鈞嗣鈞立多不法國
相二千石不與相得者輒陰中之高慎此疏典核古
勁最是精
彩范闕

周燮

燮居家清處非法不言兄弟父子室家相待如賓鄉曲不善者皆從其教

案燮字彥祖汝南安城人燮非身所耕漁則不食鄉黨宗族希得見者舉孝廉賢良方正特徵皆以疾辭亦高士也

岑熙

岑熙遷魏郡太守人歌之曰我有荆棘岑君伐之我有蝨賊岑君遏之狗吠不驚足下生鼈含哺鼓腹焉知凶

災我喜我生獨丁斯時美哉岑君於戲在茲

案熙岑彭玄孫尚安帝妹涅陽公主少為中郎將朝廷多稱其能故遷守魏郡在位二年無為而化洵良二千石也范書以附祖後故不載之循吏傳

陳楚

陳楚嘗賜食于上楚稱眼無所見以肉投羹

案賜食之禮至煩且嚴如此則不敬孰甚蓋必有不得已而然者引史者不溯其源何啻說夢范闕

李燾

李燾為青州刺史發璽書于本縣傳舍乘法駕駢駟朱

軒就路奏免四郡相百城怖懼悉豫棄官

案范書闕一家哭固猶愈于一路然封疆重臣視屬吏功名如土芥輒行劾免亦非有容之量且其中保無喜怒任情毀譽過聽者耶

燾之督案非中庸之道也

石

明

石^明為雁門太守廣宣恩惠懷保殊俗遠方皆服其德

案此見北堂書鈔遺其名范不載

陳禪

陳禪字紀山為州治中從事時刺史為人苛刻受納臧

賄禪當傳拷乃至答掠無算五毒畢加神意自若辭對
無變事遂釋

案禪巴郡
安漢人

禪拜諫議大夫永寧元年西南夸揮國王獻樂及幻人
能吐火自支解易牛馬頭明年元會作之于庭安帝嘗
與羣臣共觀大奇之禪獨離席舉手諫曰昔齊魯為夾
谷之會齊作侏儒之樂仲尼誅之帝王之庭不宜設夸
狄之技尚書陳忠劾奏禪曰昔合歡之樂舞于堂四夸

之樂陳于門今禪國越流沙踰縣渡萬里貢獻非鄭衛
之聲佞人之比而禪廷訕朝政請劾禪下獄有詔勿收
左轉為玄菟候城障尉

案禪奉詔貶秩即行就道會有遼警追拜為遼東太
守禪不用兵而服之則知諫設夸樂非徒迂濶也陳
忠沛國浚人字伯始陳咸之裔劾禪以阿帝所
謂教咸詔者忠真得其傳耶范書自有傳也

聞人統

聞人統字文公昔為督郵家貧無馬行則負擔卧則無
被連麕皮以覆不受人一餐之饋

案范
書闕

梁竦

和帝追封諡皇太后父梁竦為褒親愍侯改殯賜東園

畫棺玉匣衣衾

案竦字叔敬安定烏氏人統次子少習孟氏易以經籍自娛非富貴而驕者後為竇氏誣陷死漢陽獄至和帝以太后父故迎喪改殯也諸本竦皆誤作松松竦之兄也太后則竦所出耳

梁不疑

梁不疑子為潁陰侯睂子為城父侯冀一門三皇后六

貴人二大將軍夫人女侯邑稱君七人尚公主三人其餘卿將尹校五十七人

案范書不疑子名馬肩子名桃皆乳臭哇耳而遽佩侯印冀門驕貴若此敗家亡宗豈徒然哉不疑好經書善待士冀陰嫉之及梁氏誅滅不疑已先卒孰云天道遠耶

李壽

李壽薦異行

案范
書闕

孔喬

欽定四庫全書

後漢書補逸

喬字子松宛人也學古文尚書春秋左氏傳常幽居脩志銳意典籍至乃歷年身不出門鄉里莫得瞻見公車徵不行卒于家

案范
書闕

李易

易字子然鄭人也篤行好學不羨榮祿習魯詩京氏易室家相待如賓州郡前後禮請不應舉茂才除召陵令不到官公車徵不行卒

宋范

書闕

郎宗

宗字仲綏安丘人也善京氏易風角星算推步吉凶常負笈荷擔賣卜給食瘠服間行人莫得知安帝詔公車徵策文曰郎宗李易孔喬等前比徵命未肯降意恐主者玩弄禮意不備使難進易退之人龍潛不屈其身各致意禮遣詣公車將以補察國政輔朕之不逮青州被詔書遣宗詣公車對策陳災異而為諸儒之表拜議郎

除吳令到官一月時卒暴風宗占以為京師有大火定
火發時果如宗言諸公聞之表上博士徵宗恥以占事
就徵文書未到夜懸印綬置廳上遁去終于家子頡自
有傳

案安帝詔語允恭克讓如諸賢名不副
實何恥以占事就徵宗之識高矣范闕

王輔

輔字公助平陸人也學公羊傳援神契常隱居野廬以
道自娛辟公府舉有道對策拜郎中陳災異甄吉凶有

驗拜議郎以病遜安帝公車徵不行卒于家

案范書孔喬等四人名見樊英傳建光元年詔公車賜策書徵南陽樊英陳留楊倫及喬等六人惟郎宗楊倫到洛陽餘皆不就徵也夫樊英最知名而張楷譏其進退無據李固朱穆等以為處士純盜虛聲則英等之名乃以徵聘而毀四子之終于隱逸豈非蠱上之吉乎

施延

延字君子蘄縣人少為諸生明于五經星官風角靡有不綜家貧母老周流傭賃常避地于廬江臨湖縣種瓜後到吳郡海鹽取卒月直賃作半路亭又以養其母是

時吳會未分山陰馮敷為督郵到縣延持帚往敷知其賢者下車輪使入亭請與飲食脫衣與之餉錢不受順帝徵拜太尉年七十六薨

案范書延之見用以安帝求直言陳忠慮言事者必多激切乃上疏豫通帝意且云有道之士對問高者宜特遣一等以廣直言之路書奏詔拜有道高第士沛國施延為侍中後位至太尉則延之用忠實成之

任防

任防字文始為司隸校尉下車嘗食乾飯十日一炊閉閤不通豪右施設禁令案法貴戚斂手致相約勅不敢

干越

案范書闕謝書中語句相仿者多故當以此遜耳

王賜

王賜拜南陽太守羊皮鹿身車毀不改馬羸不易

案范書闕疑即王暢之訛也

黃昌

黃昌會稽人為蜀郡太守初昌為州書佐其婦歸寧于家遇賊被擄遂流轉入蜀為人妻其子犯事詣昌自訟

昌疑母不類蜀人因問所由對曰妾本會稽餘姚戴次
公女州書佐黃昌妻也妾嘗歸家為賊所掠遂至于此
昌驚呼前謂曰何以誌黃昌耶對曰昌左足心有黑子
自言當為二千石昌乃出足示之因相持悲泣還為夫
婦竟以禮重焉

案昌字聖貞會稽餘姚
人范書所載與此畧同

昌為宛陵令嚴毅好發姦伏有盜車蓋者昌不言密令
人至賊家掩取之悉收一家一時殺之百姓戰懼咸稱

明也

案車蓋小盜即曰杜漸何至殲其一家昌其蒼鷹乳虎之流與當是東漢第一酷吏

昌為蜀郡太守未至郡時蜀有童謠曰兩日出天兵戢

關
紹

會稽

關

紹字文肅為范令不入內舍常卧廳事上

案為令不入內舍此作縣譜也欲寡則心清而政平夫何憂煩劇朱子論孔明人物以為得寡欲養心之助意正如此范關

侯瑾

欽定四庫全書

後漢書補逸

五

侯瑾字子瑜傭作為資暮難柴讀書獨處一室如對嚴賓

案范書闕傭身讀書東漢大儒多有之後人便以傭為恥矣

樊英

順帝備禮徵拜英為五官中郎將

案時天子為英設壇席令公車令導尚書奉引賜几杖待以師傅之禮延問得失英不敢辭因拜是職然竟以高名召謗雖善言災異何補治道民不失望蓋其難哉英字季齊南陽魯陽人

祝皓

祝皓字子春志節抗烈篤于仁義為吏歸休先周旋鄉里弔死問疾畢乃還家

案范書闕末世士大夫休官歸來多驕其宗黨凌其父老胡不于子春是法

劉據

劉據為大司農以職事被譴名將加捶撲左雄諫曰九卿位亞三公班在大臣行有佩玉之節動有庠序之儀孝明皇帝始有撲罰皆非古典帝從而改之其後九卿無復捶撲者

案據事范載左雄傳被譴下有名詰尚書傳呼促步
又加以捶撲數語文較通暢夫古者刑不上大夫况
加笞撲夸于徒隸賈長沙所以痛哭也有明廷杖之
制起于宣宗後遂以為故事至有血裏朝衣預吞蟬
膽者使緹綺小卒凌辱重臣莫此為甚我
朝一除其弊超越前代萬萬孔子云君使臣以禮於戲
聖
矣

虞承

虞承字叔明拜諫議大夫雅性忠蹇在朝堂犯顏諫諍
終不曲撓散俸祿賑給諸生言德無比

案范
書闕

左雄

左雄字伯豪為冀州刺史不舉煙火長食乾飯十日一

炊

案雄南郡涅陽人范稱其刺冀州不與豪傑交通奏
案貪猾無所回忌非清毅自處豈能若是而范不載
其介節何歟至于封事屢上深中
時廼虞詡薦其有忠公節信然

戴良

戴良有失父零丁

案良字叔鷹汝南慎陽人范獨載其事母一節則必
幼而失父者也此未檢所出近高宮詹士奇天祿識

餘載之與齊諧記有失兒女零丁句
並列注云零丁今之尋人招子也

陳常

陳常字君淵晝則躬耕夜則賃書以養母

案范
書闕

薛惇

汝南薛惇為北海長史家貧坐無完席妻曰君無俸祿
給子孫復無完席耶惇以善席與妻自坐敗者妻慚不
敢復言

案此與王恭無長物事同世說不
列之德行函中亦闕事也范不載

雷義

豫章雷義字仲恭嘗濟人死罪罪者後以金二斤謝之
義不受金主伺義不在默投金于承塵之上後葺治屋
得金金主已死義乃以付縣曹又義舉茂才讓于陳重
刺史不聽義遂佯狂披髮走不應命

案義豫章鄱陽人與同郡陳重為友即
所稱膠漆不若者也仲恭范作仲公

法真

法真隱居大澤講論術藝歷年不問

一作園圃

案真字高卿一作喬卿扶風郿人太守雄之子識胡廣于諸吏中事見廣傳真為關西大儒前後四徵終不降屈范書載其答太守云以明府見待有禮故敢自同賓未若欲吏之真將在北山之北南山之南矣友人郭正稱之曰名可得而聞身難得而見逃名而名我隨避名而名我追數語皆妙天下遂開晉人風味

徐相

吳郡徐相為長沙郡守常食乾飯不發煙爨後亡遺言不受贈有一匹私馬賣以買棺

案范書闕歿則已焉猶砥節于身後聖之清者也

崔瑗

崔瑗為濟北相光祿大夫杜喬為八使徇行郡國以臧罪奏瑗徵詣廷尉瑗上書自訟得理出會病卒臨終顧命子寔曰夫人稟天地之氣以生及其終也歸精于天還骨于地何地不可藏形骸而歸鄉里其賄贈之物羊豕之奠一不得受寔奉遺令遂留葬洛陽

案瑗字子玉涿郡安平人駟之子也專心學業顛沛不廢令沒縣七年百姓歌之豈遷濟北而易其介者

何杜喬以臧罪奏也喬清剛而不免于苛細瑗之被劾或以此又華嶠書稱瑗自并日而食而愛士好客盛修肴膳或反譏其太奢臧之所由寃乎自訟得理何損于名

沈輔

沈輔字伯禽會稽山陰人也輔少儉約約身以禮喪父服闋推讓祖考財產田宅與親貧不足者

案范書闕東身以禮則必儉能儉則田宅寶賄俱為無用之物故伯禽之讓要從知禮來

范丹

范丹字史雲陳留人也所居卑陋有時絕糧閭里歌之

曰甌中生麀范史雲

案范書丹作冉注云或作丹閭里之歌尚有釜中生魚范萊蕪一句此畧也丹遠時離俗過為詭激其梁

伯鸞閭仲叔之流與

丹為郡功曹每休假上下常單步策杖同類以車牛與之不取

丹與王奐親善奐後為漢陽太守丹于道候別之奐曰行路倉卒非陳潤之所可共到前亭宿息以敘分隔丹曰今子遠適千里會面無期如其相追將有慕貴之譏

矣便起告違拂衣而去與瞻望弗反丹長逝不顧

案丹遠迹慕貴拂衣別友高行尠儔矣後世
送人作郡非忤即諂耳安得史雲一砭之

仇覽

覽為縣陽遂亭長好行教化人陳元凶惡不孝其母詣
覽言元覽呼元誚責元以子道與一卷孝經使誦讀之
元深改悔倒母牀下謝罪曰元少孤為母所驕諺曰孤
犢觸乳驕子罵母乞今自改母子更相向泣于是元遂
修孝道後成佳士

案范書覽字季智一名香陳留考城人為
蒲亭長與此不同載化導陳元事亦小異

黃真

黃真字夏甫

案真為陳留小吏吳祐舉孝廉于祖席識之後為新
蔡長世稱清節則吳祐之知人不出郭有道下也范
不載
其字

劉祐

劉祐字伯巨宗室盾緒代有名位少脩操行學嚴氏春
秋小戴禮古文仕郡為主簿郡將小子常出錢付之令

市買果實祐悉以買筆墨書具與之因白郡將言郎君
年可入小學而但傲狠遠近謂明府無過庭之教請出
授書郡將為使子就祐受經五日一試不滿呈限決罰
遂成學業

案祐字范作伯祖中山安國人仕終河南尹黨錮
事起幸不及禍其有明哲之知者耶祐一本作佑

祐為司隸校尉時權貴子弟罷州郡還京師者每至界
首輒改易輿服隱匿財寶

沈豐

沈豐為零陵太守為政慎刑重殺愛民養化罪法辭訟
初不歷獄嫌疑不決一斷于口鞭杖不舉而無刑戮僚友
有過初不暴揚有奇謀異畧輒為談述曰太守不及
也到官一年甘露降原陵佻陽五縣流被山林膏潤草
木瑞芝生于堂下

案豐隱惡揚善忠厚格天
宜有甘露瑞芝之應范闕

豐為零陵守有三黃龍望府中

豐為太守更有陰過長假還家

案豐洵良二千石也
不識范書何以見遺

羊續

羊續字興祖太山人為南陽太守以清率下半月一炊
惟卧一幅布絢敗糊紙補之

案續太山平陽人其先七世二千石續不特清風絕
人至守廬江南陽二郡削平叛賊厥功甚偉所謂淡
泊明志寧靜
致遠者耶

續為南陽守鹽鼓共一壺

續好啖生魚府丞焦儉以三月望餉鯉魚一頭續不為

意受而懸之于庭少有皮骨明年三月儉復致一魚續出昔枯魚以示儉遂終身不復食

案人雖介節不能無好投其所好取且不覺續之懸魚是真能自制者范載甚畧不如本書之腴

續妻與婢俱到官閉門不納病困謂子祕曰吾有馬一匹賣以買棺牛車一乘載喪歸勿受郡送也

案范書稱續妻與子祕到官續閉門不納即遣與母歸後卒時府丞焦儉遵續先意不受賻錢與本書不同

靈帝欲以羊續為太尉時拜三公者皆輸東園禮錢千

萬令中使督之名為左騶其所之往輒迎致禮敬厚加
賜賂續乃坐使人于單席舉緼袍而示之曰所資惟斯
而已故不登三公位而徵為太常卿

案興祖不登公位所謂不以三公易介
者較崔公冀州名士其芳臭何如范同

趙嘉


趙嘉年四十餘重疾乃為遺令勅兄子曰可立一圓石
于我墓前刻之曰漢有逸民趙姓名嘉有志無時命也
奈何投筆而卒

案范書嘉乃趙岐初名字臺卿後因避難改名岐字
邠卿范稱其遺令後疾愈仕至太常年九十餘卒此
誤

陳謙

陳謙字伯謙為御史中丞同郡宣豐時為衛尉司徒位
缺尚書欲案以補之咨問于謙謙正坐不答豐亦因士
大夫謂謙謙曰位不可妄假人三司位重上和陰陽下
訓五品豈可得處宣豐何人而欲居稷卨之官傳語者
愧而退

案伯謙不阿同郡洵乎邦
之司直德與位稱矣范闕



後漢書補逸卷十

欽定四庫全書

史部
後漢書補逸卷十一

詳校官編修臣曹錫齡

編修臣裴謙覆勘

總校官編修臣王燕緒

校對官主事臣陳墉

謄錄監生臣戴書培

欽定四庫全書

後漢書補逸卷十一

監察御史姚之駟撰

謝承後漢書第三

董种

董种琅邪姑幕人為不其令赤雀乳廳前桑上民為作

歌頌

案范書董作童种作恢注云謝書作僮种又作董仲
今所傳本乃作董种未知孰是种又有咒虎一事與
乳雀並傳當由信及豚
魚非闕仙術种字漢宗

馮緄

馮緄字鴻卿少學公羊春秋為車騎將軍南征武陵蠻賊軍至長沙賊聞悉詣營乞降進擊斬首四千餘級受降十餘萬人荊州平定賜錢一億固辭不受

案緄巴郡宕渠人學公羊春秋范作學春秋司馬兵法

緄南征表奏應奉賜金錯刀一具

案奉以緄薦為司隸及其成功又推美于奉較大樹將軍尤多讓善一節

緄子鸞舉孝廉除郎中

案范書稱緄弟允清白有孝行不載其子

周乘

周乘為交趾刺史舉奏二郡穢濁太守屬縣解印綬棄官者四十餘城

案范

書闕

宗慶

宗慶遷長沙太守人多以乏衣食產乳不舉慶切讓三老禁民殺子比年之間民養子者三千餘人男女皆以

宗為名

案此與賈父所生事絕相類而獨泯沒不章有幸不幸也范闕

彭脩

彭脩字子陽海賊丁義欲向郡郡內驚惶不能捍禦太守聞脩義勇請守吳令身與義相見宣國威德賊遂解去民歌之曰時歲倉卒盜賊從橫大戟強弩不可當賴遇賢令彭子陽

案脩會稽毗陵人時仕郡為功曹海賊所向即脩之本郡也范書稱賊張子林作亂郡請脩守吳脩與太

守俱出討賊飛矢雨集修障扞太守而為流矢所中
死太守得全賊素聞其恩信即殺弩中脩者餘悉皆
降言曰自為彭君故降不
為太守服也與此不同

劉駒駭

劉駒駭除樅陽長以病免吏民思而歌之曰悵然不樂
思我劉君何時復來安此下民

案駒駭于永初中為校書郎與謁者劉珍等著作東
觀撰集漢記因定漢家禮儀是以循吏而兼文苑未
易才也

張綱

漢安元年選遣八使巡行張綱獨埋輪都亭奏大將軍
梁冀無君之心十五事皆臣子所切齒者

案綱字文紀犍為武陽人留侯裔孫時八使中惟綱
年少官微而埋輪獨奏京師震竦冀雖固寵亦為寒
心真千古一舉也後巡使多所糾彈而冀及諸宦官
互為救請多被寢遏賴种暉復劾其罪惡國法乃伸
蓋狐狸者豺狼之爪牙自古無有
權奸在位而能澄清吏治者矣

劉虞

虞父舒丹陽太守

案虞字伯安東海郯人范載虞
祖嘉為光祿勳而佚其父名

虞通五經東海王恭之後

案范稱虞守道慕名為季漢之名宗子信然

將崇

蔣崇為北海相督郵關更選功曹吏徐蒙曰無可為者惟功曹耳崇遂署蒙遣行縣謂曰相以督郵為耳目也

案范書闕蒙自薦之公過于內舉不避親者相即從而任之可謂知人

祝良

良字邵平長沙人聰明博學有才幹以廉平見稱

良為洛陽令常侍樊豐妻殺侍婢置井中良收其妻殺之

案良令洛陽時太尉龐參夫人殺前妻子良率吏卒入府案實其事有司以良擅折辱宰相繫獄吏民守闕請代其罪者日數千萬詔乃原刑具見參傳則良真不畏強禦者然亦見東京守令能行已志如此又陳龜疏云前涼州刺史祝良初到州太守令長貶黜將半政未踰時功效卓然則良原刑後又拜刺史漢世用人若此所以多賢長吏也

王真

王真字子昌河內武德人明五經負笈追業常賃灌園恥交勢利為考城令遷漢陽太守徵拜議郎卒

案與亦獨行之士也故
與范丹友善別見丹傳

高弘

高弘字伯武河內山陽人也為琅邪相自負笈單步入
界聽探風俗厚薄

案范
書闕

弘到官悉出舍中供設付外冬坐羊皮夏坐板榻以桑
杯盛漿水妻子不厯官舍

案謝書載廉吏多而且詳范俱
遺之未免輕介節而重祿位矣

張陵

張陵字處仲為尚書初為梁冀弟胤所舉孝廉正月歲
初百官朝賀冀恃勢不恤王憲帶劍入省陵比冀入勅
羽林虎賁奪冀劍即治劾奏罪胤謂陵曰舉君適以自
罰也

案陵此舉令漢季臣子猶知有君奸臣膽落于張尚
書矣范書作梁不疑為河南尹舉陵孝廉而謝書謂
胤舉之胤亦尹河南但冀子非弟也且不疑好經書
善待士故陵為所舉彼狐狗之門處仲肯受其薦耶
此則謝之譌也陵為
楷子范附祖霸傳

盛吉

盛吉為廷尉母至冬節罪囚當斷妻夜執燭吉持丹筆
夫妻相對垂泣決罪

案吉仁心若此天下豈有冤民
范書闕會稽典錄云吉字君達

吉自掌憲平法常懇惻垂念之

皇甫規

皇甫規字威明以先零陸梁上疏自陳乃以規為中郎
將討降之會軍士大疫規親入菴廬巡視將士三軍感

悅

案規安定朝那人征羌屢著奇勲卒以忤宦官獲罪居家教授所著述皆傳世洵文為儒宗武為將表者即後黨事起乃恥以西州豪傑不預自訟于朝其真子與氏所稱豪傑之士與非霍去病趙充國之儔也

王暢

王暢拜南陽太守下車振厲威風

案暢字叔茂王龔之子范附龔傳為守時豪黨有叢穢者使吏發屋伐樹堙井夸竈亦近酷矣

暢計日受俸不啖魚肉

案時郡中奢豪相尚暢故布衣皮褥車馬羸敗以矯其弊南陽帝鄉治之不易必也狂狷乎劉景升諫之

淺矣暢子謙謙
子繁即仲宣也

朱寵

朱寵字仲藏為太尉家貧食脫粟飯卧布被朝廷賜錦被梁肉皆不敢當之

案范書寵事附見鄧騭傳中寵初辟騭府稍遷潁川守治理有聲又桓郁傳載郁門人楊震朱寵皆至三公則寵之經明行修有自來矣寵字范作仲威京兆人

許永

許永字永先為司隸校尉是時奄侍在內貴幸用勢永

舉法無所迴避京師號曰許游光

案范

書闕

于時中官子弟為令長官者並棄官去威烈風行于是
深見怨于宰臣遂見誣譖當下廷尉永謂友人曰永年
七十庶幾以忠義致身未得殲姦人之首而先賊受害
何能復入奏對刀筆吏乎遂仰藥而死

案永秉法無避權倖寒心一死
亦足報國不得以明哲譏之也

賈彪

賈彪舉孝廉補新息長小民困貧多不養子彪嚴為其制與殺人同罪養子者千數僉曰賈父所生男名賈子女名賈女以此豐丁口也

案彪字偉節潁川定陵人即所稱賈氏三虎偉節最怒者也

蘇章

蘇章字士成北海人負笈追師不遠萬里

案范
書闕

宗度

豫章宗度拜零陵令縣民杜伯夸清高不仕度就與高
談伯夸感德詣縣縣署功曹

案范書闕杜伯夸附見子根傳中名安少
有志節號奇童位至巴郡太守甚得聲譽

郭諒

郭諒字恒直朗陰人師事杜喬李固之誅詣闕上書乞
收斂不聽因往守視其喪扇護蠅蟲

案范書作李固弟子汝南郭亮諒同亮古字通耳諒
上書時年始成童義之所在死不為懼彼胡廣趙戒
輩備位三公乃畏悞不爭反受冀賞此五尺童子所
羞稱者楚國先賢傳又載南陽董班聞固死奔赴守

喪天子為之感動豈其時忠義之氣在
野不在朝乎抑冀威馭之銷鑠已甚也

楊章

楊章為杜喬所辟為平原令棄官還聞固喬曝尸星行
赴洛著弊衣赤幘守其屍驅護蠅蟲天子嘉其忠義聽
殯斂之

案范書作楊匡陳留人表書亦同范杜喬傳稱喬故
掾楊匡聞喬慘死星行到洛託為夏門亭吏守衛尸
喪又帶鐵鎖上書并乞李杜二公骸骨
太后許之因送喬喪還葬行服烈士哉

徐栩

吳郡徐栩為小黃令時陳留遭蝗過小黃飛逝不集刺史行部責栩不治栩棄官蝗應聲而至刺史謝令還寺舍蝗即皆去

案范書關蝗不入境循吏美談此更隨令來去若巧相避然甚哉德政之感召深也

宣仲

宣仲為臨涇長吏民扳留改為宜民

案劉昭注郡國志云此見謝書李固傳而范志無此固傳亦不載則范書之疎畧也

李固

固改易姓名杖策驅驢負笈追師三輔學五經積十餘
年博覽古今明于風角星算河圖讖緯仰察俯占窮神
知變每到太學密入公府定省父母不令同業諸生知
是邵子

案固字子堅漢中南鄭人司徒邵之子固忠烈彪炳
史冊彰彰而密入定省不令同業知姓名一事尤為
高畸范書獨
乃遺此何也

固五察孝廉益州再舉茂才不應王府連辟皆辭以疾

案范
書畧

固所授弟子潁川杜訪汝南鄭遂河南趙承等七十二人相與哀嘆以為眼不復瞻固形容耳不復聞固嘉訓乃共論集德行一篇

案時梁冀兇虐人避其馭杜訪輩乃能表彰固行哀集成書可謂不負其師矣范書但有趙承名

固臨終勅子孫素棺三寸幅巾殯斂于本郡境埆之地不得還墓塋汚先公兆域

案固為梁冀所害年僅五十四范但載固與胡廣趙戒書不錄此勅又案固對策引進銳退速二語為老子篇續漢書亦然章懷注云謝書作孟子

趙戒

戒字志伯蜀郡成都人也博學明經講授舉孝廉累遷
荊州刺史梁商弟讓為南陽太守恃椒房之寵不奉法
戒到州劾奏之遷河間相以冀部難理整厲威嚴遷戒
南陽太守糾豪傑恤吏人奏免中官貴戚子弟為令長
貧濁者徵拜為尚書令出為河南尹轉拜太常永和六
年特拜司空

案范書戒附見李固傳固議立清河王引胡廣及戒
寓書勸冀冀不從戒等遂懼威遷易守正不堅惜哉

子典以共誅宦官
下獄其益愆矣

趙典

趙典太尉戒之叔子也學孔子七經河圖洛書內外執
術靡不綜貫受業者百有餘人天子宗典道懿尊為國
師位特進七為列卿寢布被食用瓦器靈帝即位典與
竇武王暢陳蕃等謀共誅中常侍曹節侯覽趙忠等皆
下獄自殺

案典字仲經范稱典遷長樂少府衛尉公卿表典博
學篤聞宜備國師會病卒使者弔祠乃與此大異表

紀載陳寔事亦無趙典名叙王暢事蹟頗繁而誅常侍事亦不列暢此云下獄自殺恐有舛謬

姁皓

吳郡姁皓父為南郡坐事繫獄皓懷小石至公卿門輒出石叩頭流血覆面父遂得免

案寔武傳稱尚書令陳蕃胡廣等皆國之貞士朝之良佐尚書郎張陵姁皓等文質彬彬明達國典則皓之賢可知矣懷石救父至誠而動也范闕

尹苞

陳留尹苞與同郡范史雲善二人俱貧出入共一單衣

到人門外苞年長常先著衣入須臾出解與史雲

案范書稱史雲所親善者李固王
真也尹苞事無傳此范之遺畧者

朱穆

朱穆為尚書歲初百官朝賀有虎賁當階置弓于地謂
羣僚曰此天子弓誰敢干越百僚皆避之穆呵之曰天
子之弓當戴之于首上何敢置地大不敬即收虎賁付
獄治罪衆皆肅然服之

案穆字公叔南陽宛人亦稱文忠先生祖暉范書有
傳穆附焉避弓事續書作桓帝臨雍與此不同夫小

人假密神器侮弄大臣往往有之
公叔臨事不惑可為士大夫吐氣

穆為尚書謹言正直

穆因進見諫曰臣聞漢家舊典置侍中中常侍各一人
省尚書事黃門侍郎一人傳發書奏皆用姓族自和熹
太后以女主稱制不接公卿乃以閹人為常侍小黃門
通命兩宮自此以來權傾人主窮困天下宜皆罷遣博
選耆儒宿德與參政事

案常侍持權始于和熹後世乃承女主故事遂至肆
橫故雖女中堯舜亦不宜稱制也使早從穆言豈至

亡國于奄
暨之手哉

穆少有英才學明五經性矜嚴疾惡不交非類年二十
為郡督郵迎新太守見穆曰君年少為督郵因族勢為
有令德穆答曰郡中瞻望明府如仲尼非顏回不敢以
迎孔子更問風俗人物太守甚奇之曰僕非仲尼督郵
可謂顏回也遂厯職股肱舉孝廉

案穆以顏子自擬未免過當然觀其為人立節忠清
虔恭機密亦賢者也蔡邕謂其貞而孤有羔羊之節
良然穆文詞更擅絕古今邕乃至其家自
寫之特絕交一論不無偏狹耳范不載

穆為冀州刺史有宦者趙忠喪父僭為璠璣玉匣穆下
郡案驗遂發墓剖棺陳尸出之而收其家屬帝聞大怒
徵詣廷尉穆臨當就道冀州從事欲為畫像置廳事
上穆留板書曰勿畫吾形以為重負忠義之未顯何形
像之足紀也

案此足見公叔之貞而孤也楊龜山識其從梁冀
之辟不得為貞孤亦責備賢者意耳畫像事范闕

劉寵

劉寵為司徒卧鹿麕布被

案寵字祖榮東萊牟平人即為會稽守選一大錢
受之者也位至三公清操不易乃知布被非詐

唐約

唐約字仲謙拜尚書閑習舊典質素密靜自典機樞數
有直言美策每作表疏皆手自書之不宜于外處官不
言貨利之事當法不阿所私京師謠曰治身無嫌唐仲
謙

案無嫌嫌字非徒以韻與謙押也禮所以別嫌疑嫌
疑之際聖人所謹故公而嫌于私國而嫌于家人欲
一毫未淨皆嫌也安得
無嫌如仲謙哉范闕

荀緄

荀緄字伯條拜尚書性明亮敏于衆職以最羣僚秉機平直公卿大夫莫不憚之

案范荀淑傳淑仲子名緄八龍之一當即此也又淑兄子昱亦字伯條何命字竟相同與又緄為濟南相畏憚宦官為子或娶唐衡女行事若此公卿大夫安得憚之豈別有一荀緄耶

曹破石

曹節弟破石為越騎校尉越騎營五伯妻有美色破石從求之五伯不敢違妻執意不肯行遂自殺其縱暴無

道多類此

案范書見宦者曹節傳中節與王甫輩誅武蕃幽殺太后權勢炎灼殆在左回天唐獨坐之上腐身薰子之禍至此極乎破石之奪人妻其罪之小小者爾

龔遂

龔遂字巨卿拜尚書郎性敏達彌縫舊章深識典故每入奏事朝廷所問應時建白桓帝嘉其才臺閣有疑事一以委遂處當平決口筆俱著轉左丞

案口筆俱著四字簡而潔使拙手為之數語不了也范闕

胡騰

胡騰辟荊州部南陽從事遇桓帝南巡又為護駕到南陽騰自表上言乘輿所幸便為京師臣請荊州刺史比于司隸臣職比于都官從事也

案騰字子升桂陽人騰之此表以扈蹕勲戚徵求無厭故自請比職都官得以禁戢暴橫引史者刪其前後遂覺無關係矣騰為竇武府掾武誅獨殞斂行喪坐是禁錮義士哉

騰為從事萬事既辦一州肅然百寮敬服其能

應奉

應奉字世叔少聰明自為兒童及長凡所經履莫不暗記讀書五行俱下終成名儒

案奉汝南南頓人自曾祖父順為將作大匠後七世通顯奉文武並展卓然人傑子幼即著漢官儀風俗通者應氏故世以文章顯也范同

奉為上計吏許訓為計掾俱到京師訓自發鄉里在路書頌暮宿所見長吏賓客亭長吏卒奴僕目所更見皆密疏姓名欲試奉還郡出疏示奉奉省讀之云前食潁川綸氏都亭亭長胡奴名祿以飲漿來何不在疏坐中

皆驚

案今人行程每作日記若得與世叔同遊便是行日記矣何必手錄畫頓暮宿四字亦鍊

奉年二十時嘗詣彭城相袁賀賀時出行閉門造車匠于內開扇出半面視奉奉即委去後數十年于路見車匠識而呼之

案二事范書俱不載奉之天資絕人如此宜其文武為憲也

奉拜武陵太守坐公事免後武陵蠻復寇亂荊州車騎將軍馮緄請與俱征拜從事中郎時詔奉曰蠻夷叛逆

作難積惡放恣鑊中之魚火熾湯盡當悉焦爛以刷國恥朝廷以奉昔守南土威名播越故復式序重任奉之廢興期在于今賜奉錢十萬駸犀方具劍金錯把刀劍革帶各一奉其勉之

案奉之功馮緄實成之見前緄傳

陳蕃

陳蕃為樂安太守郡人周璆高潔之士前後郡守招命莫肯至惟蕃能致焉字而不名特為置一榻去則懸之

案蕃見東觀記此所載與范同懸榻事
人不知有周璆則以孺子高名掩之耳

蕃為豫章太守雅正矯俗以禮道下

蕃諫桓帝曰當今之世有三空田野空朝廷空倉庫空
是謂三空加之兵戎未戢四方離散是陛下焦心毀顏
坐而待旦之時也豈宜揚旗耀武騁心輿馬之觀乎

案時桓帝有幸廣成校獵之舉故蕃疏諫之

周樹

周樹達于法善能解煩釋疑八辟從事

樹為從事刺史孟觀有罪俾樹作章陳事序要得無罪也

案范書闕老吏刀筆能于一二字間出入人罪當奉樹為鼻祖

胡廣

廣有雅才學究五經古今術藝皆畢覽之年二十七舉

孝廉

案廣字伯始南郡華容人

廣在台輔三十餘年經事六帝禮任甚優每遜位辭疾

及退逸田里未嘗滿歲輒復升進凡一履司徒三登太尉及為太傅其辟命皆天下名士與故吏陳蕃李咸並為三司蕃等每朝會輒稱疾避廣時人榮之

案廣生榮死哀為漢興以來人臣第一但始同李杜議立清河繼憚于梁遂爾遷易阿順卒以受封析爵所稱天下中庸者得無以鄉原為中行乎

靈帝思感舊德乃圖廣及太尉黃瓊于省內詔議郎蔡邕作頌文曰巖巖山岳配天作輔降神有周生申及甫允茲漢室誕育二后曰胡曰黃方軌齊武維道之淵維德

之數股肱元首代作心膺天之蒸人有則有類我胡
我黃鍾厥純懿巍巍特進仍踐其位赫赫王事七佩
其紱奕奕四牡沃若六轡袞職龍章其文有蔚參曜乾
台窮寵極貴功加八荒羣生以遂超哉邈乎莫與為二

案邕有言吾為碑銘多矣惟郭有道無愧耳此
頌雖奉制而作然胡公當之得不愧乎范闕

韋著

韋氏為三輔冠族著少修節操持京氏易韓詩博通術

藝云

案著京兆人韋豹之子范附見韋彪傳中少以經行知名屢徵不就後乃為中常侍逼迫不得已拜東海相竟坐論輸左校隱者恥之北山有靈能無逋客之謝

李曇

曇少喪父躬事繼母酷烈曇性純孝定省恪勤妻子供奉寒苦執勞不以為怨得四時珍玩先以進母與徐孺子等海內列名五處士焉

案曇字雲周潁川人范附見徐穉傳中陳蕃胡廣薦章稱其德行純備蓋非徒以隱為高者

姜肱

肱祖父為豫章太守父為任城相性篤孝事繼母恪勤
母既年少又嚴厲肱感凱風之孝兄弟同被而寢不入
房室以慰母心也常與季江俱乘車行適野廬為賊所
劫取其衣物欲殺其兄弟肱謂盜曰弟年幼父母所憐
愍又未聘娶願自殺身濟弟季江言兄年德在前家之
珍寶國之英傑乞自受戮以代兄命盜戢刃曰二君所
謂賢人吾等不良妄相侵犯棄物而去肱車中尚有數
千錢盜不見也使從者追以與之亦復不受肱以物經

歷盜手因以付亭吏而去

案肱字伯淮彭城廣戚人肱有二弟仲海季江季其少也世但知姜被為雁行佳話而不知天天棘心又有慰母一片苦忱
微謝書孰表之

靈帝手筆下詔曰肱抗凌雲之志養浩然之氣以朕德薄未肯降志昔許由不屈王道為化夸齊不撓周德不虧州郡以禮優順勿失其意

案如詔語非聖主不能乃靈帝手筆得之要見當時風氣下以石隱為高上以求賢為美

楊高

楊高字聖建拜尚書淵懿博雅治術亦辦優納王事明習國家典故幹機密之職夙夜周慎退食自公儀表偉麗每朝賀百寮側目

案范
書闕

羊陟

羊陟遷河南尹計日受俸嘗食乾飯茹菜禁斷豪右書疏不與交通斷理冤徒進用善士節操者旌表異行

案陟字嗣祖太山梁父人奏黜宦姻升進清亮後黨事起僅免官禁錮其有明哲之知者耶

郭泰

泰遭母憂歐血發病歷年乃瘳

案泰字林宗太原界休人家世貧賤篤生畸士東漢人品卓然第一泰范書作太此蔚宗私諱今宜改正

泰之所名人品乃定先言後驗衆皆服之故適陳留則友符偉明遊太學則師仇季智之陳國則親龐德公入汝南則交黃叔度初泰始至南州過袁奉高不宿而去從叔度累日不去或以問泰泰曰奉高之器譬之汎濫雖清而易挹叔度之器汪汪若干頃之波澄之不清撓

之不濁不可量也已而果然泰以是名聞天下

案范書載泰所鑒士左原茅容輩十許人此皆范所遺也

泰所識太原郭長信王長文長文弟子師韓文布季子政曹子元定襄周康子西河王季然雲中丘季智名靈舉子師位至司徒季然北地太守其餘多典州郡者

案此皆泰同郡人也范不列其官位

泰以建寧二年正月卒自弘農函谷關以西河內湯陰以北二千里負笈荷擔彌路柴車葦裝塞塗益有萬

數來赴

案范書但言千餘人
會葬而已不詳載

劉儒

郭林宗歎儒有珪璋之質終必為令德之士

案儒字叔林東郡陽平人林宗
稱其為口訥心辯真儒者也

李咸

咸字元卓汝南西平人孤特自立家貧母老常躬耕稼
以奉養學魯詩春秋公羊傳三禮三府並辟司徒胡廣

舉茂才除高密令政多奇異青州表其狀建寧三年自
大鴻臚拜太尉自在相位約身率下常食脫粟飯醬菜
而已不與州郡交通刺史二千石牋記非公事不發省
以老乞骸骨見許悉還所賜物乘敝牛車使子男御晨
發京師百僚追送盈塗不能得見家舊貧狹庇蔭草廬
案范書咸無傳僅見胡廣傳中云廣所辟命皆天下
名士與故吏陳蕃李咸並為三司夫以咸居台輔而
清節若此范
書遺之何也

度尚

尚進善愛人坐以待旦擢門下書佐朱儁恒歎述之以為有不凡之操儁後官至車騎將軍遠近奇尚有知人之鑒

案尚字博平山陽湖陸人特善于用兵數平寇盜乃始由宦者進繼嫁禍張磐欲誣已過其亦小有才者耳續漢書云尚事母至孝通京氏易古文尚書為吏清潔畧與范不同使尚果以孝子通經術豈肯呈身中貴誣謗同列耶

劉瑜

劉瑜父祥為清河太守

案瑜字季節廣陵人范載其父名辦與此異瑜上書陳事切中時機詔問災咎悉心直對亦剛直之士也

孔恂

孔恂字巨卿新淦人為州別駕從事車前舊有屏星如刺史車曲翳儀式是時刺史行部發去日晏刺史怒欲去別駕車屏星恂諫曰明使君傳車自發晚而欲撤去屏星毀國舊儀此不可行別駕可去屏星不可省即投傳去刺史追辭謝請不肯還于是遂不去屏星

案諫既行矣何必投傳漢人尚氣節如此屏星車當也見說文范闕

楊喬

楊喬字聖達烏悅人也前後數上書陳故事

案范書喬事附見弟璇傳中

喬為尚書侍郎轉左丞自在臺閣閑練漢家故事前後上表陳國政便宜

喬為尚書容儀偉麗數上書言政事桓帝愛其才貌詔妻以公主喬固讓不聽遂閉口不食七日而死

案喬辭婚事義又出宋弘之上然益見世祖不强宋公之聖德矣又孟嘗傳載喬薦嘗疏云臣前後七表

而身輕言微終不蒙察喬之薦賢其誠如此別
本作楊高字至達高近喬聖近至傳寫訛耳

竇武

竇武上表曰今冬大寒過節毒害鳥獸爰及池魚城傍
松竹皆為傷絕

案武字游平扶風平陵人范書載武封事不見此語
或其所刪也又案襄楷傳楷延禧中因災異上疏有
云前七年冬大寒殺鳥獸害魚鰕城傍竹栢之葉有
傷枯者又續漢書延熹元年洛陽城傍竹栢葉有傷
者二書
正指此

朱震

朱震字伯厚性剛烈初為從事奏濟陰太守單匡臧罪
并連匡兄中常侍車騎將軍超三府諺曰車如雞棲馬
如狗疾惡如風朱伯厚

案震陳留人范附見陳蕃傳中震為仲舉之友仲舉
被難震棄官哭之匿其遺孤事覺誓死不言亦烈矣
哉

震仕為郡王簿時戶曹史袁叔穉以微過太守郭琮怒
閉閤罰之衆皆悚懼震排闥直入乃前諫曰袁史則故
御史珍之孫何為苛罰脫有奄忽如何遂釋之

案范
不載

震又為郡從事曰震宿有負薪之憂力疾就車職重人
輕必不堪久時濟陰太守單匡在官放恣辟震詣見曰
當為鷹犬

案此即奏匡以前事
謝必有傳故詳序之

賀純

純字仲真會稽山陰人少為諸生博極羣藝下辟公府
三舉賢良方正五徵博士四公車徵皆不就後徵拜議

郎數陳災異上便宜數百事多見省納遷江夏太守

案范書李固傳云陛下即位聘南陽樊英江夏黃瓊廣漢楊厚會稽賀純則純之名與英瓊比高也

王逸

南郡王逸素與樊英善因與其書多引古譬諭勸使就

聘英順逸議談者失望

案范書無逸傳謝此事亦應載樊英傳中英初被詔命僉以為必不降志及後應對又無奇謀深策英之名高毀甚逸實成之

符融

融見林宗便與之交以紹介于膺以為海之明珠未耀其光鳥之鳳凰羽儀未翔膺與林宗相見待以師友之禮遂揚名天下融致之也

案融字偉明陳留浚儀人為李元禮高足以郭介李遂有仙舟之羨則林宗最知人而偉明又知林宗其識巨矣

融遭黨事禁錮妻亡貧無殯斂潁川張元祖志行士也來存融弔其妻亡知其如此謂言足下欲尚古道非不清妙但禮設棺槨制杖衰孔子曰吾從周便推所乘羸

牛車以給殯融受而不辭云

案范稱融妻死鄉人欲為具棺服融不肯受曰古之亡者棄于中野惟妻子可以行志云云與元祖所勸正合此云貧無殯斂似誤

馮岱

馮岱字德山辟司徒劉寵府與四府掾屬並詣臺集議邊事

案范書岱為陳留太守附見符融傳中

岱性忼慷有文武異才既到官融往相見薦苑冉為功

曹韓車為主簿孔佃為上計吏

宋果

宋果字仲文

案范書果事見郭泰傳果性輕悍賴林宗訓之遂折節為善仲文范作仲乙扶風人

徐淑

淑字伯進廣陵海西人也寬裕博雅好學樂道隨父慎在京師贊孟氏易春秋公羊禮記周官善論太公六韜交接英雄常有壯志舉茂才除渤海修令遷琅邪都尉

案是時左雄設限年試才之法淑年未及舉本郡充
選雄以聞一知幾詰之乃譴却郡夫知一乃徹始徹
終之明知十乃因此推彼之學如以數求便成笨伯
左雄詰問或乖本旨然澄清選舉未為失也後淑為
度遼將軍有名于
邊見子璆傳中

劉寬

寬少學歐陽尚書京氏易尤明韓詩外傳星官風隅算
歷皆究極師法稱為通儒未嘗與人爭勢利之事

案寬見東觀記范書絕不載寬之能
學僅以為長者而已母乃失文饒耶

寬嘗行有人失牛者乃于路就寬車中認之寬無所言

下駕步歸有頃認者得牛而送還叩頭謝曰慚負長者
寬曰物有相類事容脫誤幸勞見歸何為謝也

案此與卓茂認馬事絕相類由其胸中不見人非
不見已是推一牛之細凡名利何處著爭競來

袁忠

袁忠乘船戴笠詣王朗見朗左右僮從皆著青絳綵衣
非其奢麗即辭疾發而退

案忠字正甫為袁閎弟官沛相以清亮稱
附見閎傳王朗字景興肅之父也范畧

吳馮

吳馮字子高為州郡吏休假先存恤行喪孝子次瞻病畢拜觀鄉里耆老先進然後到家名昭遠近

案范書闕此可為今世告儆士大夫法

郭賀

郭賀字喬卿為荊州刺史到官有殊政百姓歌曰厥德仁明郭喬卿忠正朝廷上下平

案賀雒陽人范附蔡茂傳後顯宗巡狩賜以三公之服又勅行部去襜帷帝之褒與百姓之歌何相符也又郭躬孫亦名賀范別有傳

後漢書補逸卷十一